

牧

齋

初

學

集

牧齋初學集卷第七十九

啓

賀福清相公啓

伏諗釋位言歸稱觴初度退應四時之序卷之
則藏壽居五福之先吉無不利其爲慶慰曷可
名言竊謂完名全節抗章每歎於昔人迂身善
君作相獨難於今日一辭而退則恐出山之小
草徒然有負於蒼生抵死不休則爲耐彈之綿
花畢竟何顏於黃閣誠進退之維谷豈上下之
不交試觀近代之公卿少有完傳卽或引年而

壽考不免遺譏恭惟老師相公閣下生甫及申
既明且哲先憂繫於民譽爰立簡於帝心當
大任於人主拱默之時維其艱矣渙小羣於
舉朝騰沸之日或者疑之矧猶有社稷之憂恐
或在蕭牆之內蜚吻裂鼻如神農之嘗毒一日
而百生忘寢遺餐如孔子之聞韶三月而不改
以精誠之一寸格神聖於九閭已奏膚公遂從
雅志封還御札猶聞中使之傳宣杭別都門
遂藹羣公之祖帳未逮懸車之歲先爲秉燭之
游臥里門者五年歷春秋始六十偕故人於里

舍說彼平生列孫子於長筵語以帝德樂聖
人而飲酒顧影頽然想長安之奕棋推枰莞爾
恩波浩浩長爲平地之神仙噩夢悠悠回想格
天之事業自此坐致難老之壽予以仰祈有道
之長謙益翰苑焦茅公門長物豈云報德足當
衣鉢之私苟不辱知或在文字之末酌彼大斗
占星嘗望乎高閩侑以南山歌風敢陳於下里

答方長治啓

千里一土方興異代之艱片字百金遂獲同心
之貺笑與抃會愛以知并竊念某章句小儒菰

蘆賤士十年不字知偃蹇已久棄於時四十無
聞悔氏名之浪傳於世紙憲竹屋念生平之况
味仍是昔人金門玉堂想年少之振登有如因
夢蓋久已自分爲長物誠不敢竊附於名賢何
意單疎猥賜示問恭惟某官門下才全而德備
外義而內仁以高文發跡賢科以異政著稱循
吏固已名動區極聲薄雲天而又渾然天成絕
去崖岸尚賢而與能崇知而卑禮如余廓落未
奉聲塵徒以我友之云遂託伊人之好存其管
蒯飾以青黃不鄙其篆刻蟲雕而獎以掌故下

窮之業不笑其螢乾蠹死而慰以汗青有日之
期通懷若斯負媿何已至如疆場之多事正當
朝著之乏人借箸而籌自笑何賢於博奕廢書
而歎徒然仰視乎屋楹伏承來命之拳拳轉使
我心之痒痒卽其談邊陲之大計不遺鄙人則
知懷社稷之深憂尚有君子我之懷矣何解於
安石之蒼生君其勉諸行將爲方叔之元老

帳詞

賀任文昇侍御考滿帳詞

伏以青蒲白簡凜橫榻之威名金鐘大鏞壯

本朝之氣色雅望久崇於惟月膚公行著於爲
霖薄海聳歡留臺增重恭惟某官秀山靈氣通
海榮光宵苞吐鳳之雄文早魁縈榜手擅解牛
之妙技出宰花封春歌寡和於郢中霜簡獨高
於白下矢心憂國每懷焚草之忠勤抗疏辨奸
詎減裂麻而慟哭圖箱車而經武氣懾彊胡監
闡棘以衡文風清瑣院爬垢蠹以裨國計何畏
馮城蒐金矢以佐軍興用舒仰屋廷臣無出右
者 天子居然器之比及三年游膺上考當國
家屬精之日爭赴功名况疆圉多事之時尤資

俊傑人事修而天文數變戒心狡而民力中乾
徒使至尊之獨憂誰恥四郊之多壘我之懷
矣徒深向日之思國有人焉實藉回天之力不
聞不見察周嫫之私憂未亂未危回越人於驚
走朝廷深知治行豈但儀簪橐之班牙肅不
足爲榮要當勉旃嘗之績某久欽白筆忻頌緇
衣髻已雙蓬兀坐閭閻而曝日身猶一葉喜聞
臺閣之生風事大夫之賢徒跂望其儀羽聽輿
人之誦敢嗣響於風謡調歸朝歡爲祖道贈
石城天闕風光好鳳凰臺上春回早青袍御史

去朝天矯驄踏遍燕山草虜騎知多少演兵車
風掀電掃白山前勒石磨厓紫禁煙花曉再
敷奏治安書稿先記取東南枯稿將海內周回
布算一盤棋從頭探討方叔今元老佐中興采
薇天保要擎天但須隻手整頓乾坤了

書

上高陽師相書

謙益再疏得請已於十二月廿九日出國門歸
而奉老母讀殘書長爲虞山下一老農不辱師
門庶其在是惟是仰籌國事俛念師恩幽憂慮

歎住復於懷義不忍以去國之人喑默而不言
也是以敢私布之恭惟老師以黃閣元老出而
視師更置將率蒐討軍實榆關一墻屹爲長城
老師一日在關奴必不敢牧馬南下而畿輔可
以高枕矣一旦聖天子念老師暴露良苦趣
召還政事堂關城之事其誰任之撫道有如胡
宗憲朱紱其人者乎諸將有如戚繼光俞大猷
其人者乎語有之人各有能有不能羣天下高
足闊步大言不量之徒與夫小廉曲謹矜已傲
物之士而責之以決大計成大功吾有以知其

不能也又况巧僞塗飾容頭過身之人又豈可
以其寃言無當誤而聽之乎爲老師計當亟擇
一沉雄博大可當戰守恢復之任者告之天
子一以關城之事委之而已則從容燕閒往來
登萊關海間總其機宜而責其成功斯當今第
一切務也以神堯之聖失之伯鯨以孔明之賢
失之馬謖今日之禦夷止在一關今日之守關
止藉一人昔日已非一誤今日何可再誤願老
師之熟思之也自古克敵制勝其事不一要必
節鎮與將率爲一將率與偏裨爲一偏裨與士

卒爲一曉暢洞達欣說鼓舞歡然有樂生之心而愾然有誓死之氣然後可以致果殺敵無往而不利今關門之上營制已立行伍已明可謂有律矣然有將士行伍之兵而未必有父子兄弟之兵千百夫之長以及士卒廩廩奔命如不終日大抵秋陰擎歛之令多而向榮脈發之意少如是而何以戰戰何以勝卽不戰而又何以守也且夫勾稽米鹽會計出內爲國家節省幾何畜積幾何此計部度支之事也非行軍用師者之所宜也用兵之道驅赤子而蹈白刃有退

死無進生而曰女必爲我徒死女必不冒破一錢不虛費一粒節身量腹而安然爲我死則人必失笑而却走矣范文正經略西夏臺諫劾其所舉官侵漁邊餉文正上章理之且曰邊吏勞苦酒食讌會不宜過爲損削前輩知大體捐細故如此士安得不爲之死而功安得不成乎聞守關之將令曰士登陴夜然燭相繼以便守望今非不善也每燭一枝直三錢關城風急夜然十餘燭才可達旦計一月然燭之費幾及一千錢而官所給未及半也士月給糧餉不能宿飽

安得有餘錢買燭燭稍不繼邏者刺得之又必
出四五百錢爲請方得解此事甚小然大將親
細務而小卒困將令槩可見矣願老師正告將
率大創積習一如李牧王剪所以用衆之法使
關門有父子兄弟之兵則退可完守進可決戰
而奴不足憂矣夫謙盜之所言者皆老師之所
知且以爲不足知者也然古之大人君子集天
下之事成非嘗之功必使吾之所知與其所謂
不足知者人人得挾以至於吾前而後羣策羣
力胥天下爲吾用而吾得以坐制而不勞詩不

云乎詢於薊薊夫不待詢採而冒昧以其言進
斯必爲薊薊之所笑矣以謙益之將隱也杞人
之憂不敢以告人而效其一二於師門并以爲
別謙益惶恐死罪

答唐訓導

汝諤

論文書

謙益啓累辱過存未獲接奉復蒙不鄙賜
之書教欲推避以文墨事衰遲失學無以承命
歎息踖躅感然累日門下兄弟以雄才博學
棹輓藝苑所著古今詩解各出手眼務爲世之
承學啓聾發聵其爲功於斯文也可謂專且博

矣反覆來教穿穴數千載極論本朝諸公而以
王弼州爲依歸殆以爲至於斯極者門下虛懷
下問不惜取道於瞽僕雖固陋亦嘗奉教於君
子矣安敢閼其所聞不一二陳道於左右夫文
之必取法於漢也詩之必取法於唐也夫人而
能言之也漢之文有所以爲漢者矣唐之詩有
所以爲唐者矣知所以爲漢者而後漢之文可
爲曰爲漢之文而已其不能爲漢可知也知所
以爲唐者而後唐之詩可爲曰爲唐之詩而已
其不能爲唐可知也自唐宋以迄於國初作者

代出文不必爲漢而能爲漢詩不必爲唐而能爲唐其精神氣格皆足以追配古人其閒爲古學之蠹者有兩端焉曰制科之習比於俚道學之習比於腐斯二者皆俗學也然而文章之脈絡盡然如江河之行地代有其人人有其傳固非俗學之可得而亂也弘正之間有李獻吉者倡爲漢文杜詩以叫號於世舉世皆靡然而從之矣然其所謂漢文者獻吉之所謂漢而非遷固之漢也其所謂杜詩者獻吉之所謂杜而非少陵之杜也彼不知夫漢有所以爲漢唐有所

以爲唐而規規焉就漢唐而求之以爲遷固少陵盡在於是雖欲不與之背馳豈可得哉獻吉之才固足以顛頓馳騁惟其不深惟古人著作之指歸而徒欲高其門牆以壓服一世矯俗學之弊而不自知其流入於繆斯所謂同浴而譏裸裎者也嘉靖之季王李閒作決獻吉之末流而颺其波其勢益昌其繆滋甚弇州之年旣富於李而其才氣之饒著述之多名位之高尤足以號召一世然其爲繆則一而已今觀弇州之詩無體不具求其名章秀句可諷可傳者一卷

之中不得一二其於文卑靡冗雜無一篇不偁
背古人矩度其規摹左史不出字句而字句之
譌繆者累累盈帙聞其晚年手東坡集不置又
亟稱歸熙甫之文有久而自傷之語然而歲月
逾邁悔之無及亦足悲矣夫本朝非無文也非
無詩也本朝自有本朝之文而今取其似漢而
非者爲本朝之文本朝自有本朝之詩而今取
其似唐而非者爲本朝之詩人盡蔽錮其心思
廢黜其耳目而唯繆學之是師在前人猶倣漢
唐之衣冠在今人遂奉李王爲宗祖承譌踵僞

莫知底止僕嘗論之南宋以後之俗學如塵羹塗飯稍知滋味者皆能唾而棄之弘正以後之繆學如僞玉贗鼎非博古識真者未有不襲而竇之者也繆學之行惑世而亂真使夫人窮老盡氣至死而不知悔其爲禍尤慘於俗學二十年來亦有知訾謗李王者矣學彌捐而識彌下若近年之談詩者蒼蠅之鳴作於蚯蚓之竅遂欲以一隙之見上下古今公安袁小修嘗歎息曰少陵秋興元白長恨諸篇皆千秋絕調彼何人斯奮筆簡汰此輩無心所以眯目賢哉小修

其所見去人遠矣嗟夫古學一變而爲俗俗學
再變而爲繆繆之變也不可勝窮五方之音變
而爲鳥語五父之達變而爲鼠穴譬諸病症愈
變愈新自良醫視之其所繇傳染要不離於本
病而已誰生厲階至今爲梗豈能不追歎於獻
吉哉門下力學揆文卓然有志於古學者也故
敢爲門下誦其所聞願門下於古詩解壹本古
人爲解故而盡削妄庸附會之語庶幾古學粲
然復明於世其爲功於斯文也誰能尚之昌黎
有云蚍蜉撼大樹可笑不自量僕學殖荒落文

筆袞退於文墨事誠不足以當蚍蜉顧其從事於斯深思而詳說之蓋有日矣如世之叫囂跋扈撼前修以要名者自分無有惟門下裁而教之某再拜

與京口性融老僧書

不肖孽深障重慈母奄逝伏承大德遠賜弔唁法門眷屬慈悲哀愍感泣之餘不勝隕絕承示教著述種種屬累流通證明雖在苦塊之中五內崩潰倘能仰宣佛法即可俯答慈恩自當瀝血數文滴淚和墨豈敢以荒迷爲辭廢業自解

哉第展轉思惟殊多疑惑庸敢披露真心酬諮
下問竊嘗謂大藏經論浩如煙海諸大法師論
師疏鈔注解不啻入海算沙雖復窮年研味皓
首披陳尚不能了後人更於何處別出手眼縱
復有一知半見自謂名通譬諸日月中天而燭
火螢火依微自炤不亦勞而無功乎維摩結所
說經做秀才時曾閱肇公疏義言簡義精嘗謂
如郭象注莊王弼解易可以離經而孤行也今
之擬徵於肇公同乎異乎如其同也何取於以
水濟水曾無益乎牛毛徒自添其蛇足如其異

也不冒吳楚僭王之譏則貽武夫亂王之誚矣
法華直解未遑諦觀援例斷駁當亦如是楞嚴
一經集長水之會解經無盡之刪定近代又有
交光法師親承記荊大闡密微師之要領指歸
何若豈欲效評唱之宗風以文句爲牽勸乎且
以宗判教則尋行數墨畢竟剜肉成瘡以教明
宗則句後聲前又是無風起浪徒滋學人之擬
議未蒙佛祖之印可殆不如不作之爲愈也目
連願法具見慈心循本而談亦有未安試請大
德深自思惟果能具目連之六通向如來之王

覺撈籠含識津筏幽明不妨代金口爲宣說現
白毫而濟度若猶未也則水陸之齋儀慈悲之
法懺翹勤頂禮利益弘多何必擅立科儀自創
壇宇以世法喻之內制掌之閣臣外制草於翰
苑欽承 帝命口代 天言又必先呈 御覽
後付尚璽然後渙汗風行絲綸雷動若使六卿
競管詞頭百辟爭揮書命則王言出自多門詔
令能無掛壁吾有以知其不可也願法之作未
知以何事因緣奉何佛勅旨誓願之力固不唐
捐矯誣之嫌殆亦未免更須求大悲智人重加

勘辨耳昔人感婆子機緣立焚疏鈔伏願大德
徇芻蕘之狂言回桑榆之末炤於鄙人作婆子
觀於諸著述作疏鈔觀但能然祖龍一炬之火
卽是演法門無盡之燈心光炳然大千俱了若
不肖見短察眉過滋多口惟有然燈炷香向佛
前發露懺悔而已知我罪我惟師命之上已後
一日謙益稽顙再拜

與卓去病論經學書

謙益頓首前辱示經解數篇置几案閒偶一繙
閱得詩二傳考有詩傳宗端木之語蹙然而起

曰世安得有此書恨無從取而徵之讀至終篇乃盍然而笑曰古今經傳之疑義有必須詳考曲證而後明者有可一言而決者所謂可一言而決者此類是也前漢儒林傳魯人申公爲魯詩齊人轅固生爲齊詩燕人韓嬰爲韓詩趙人毛萇傳詩是爲毛詩毛詩傳自子夏隋經籍志謂毛詩序子夏所創毛公及東漢衛宏所潤益先儒相承授受如是而已子貢之詩傳傳之者三家耶大小毛公耶古書之淪亡而晚出多矣齊建武中得尚書舜典於大柎晉太康中得紀

年師春於汲縣此書何從而得之孟喜從田王
孫受易得易家候陰陽災變書詐言田生且死
時枕鄰獨傳喜梁丘賀謂安得此事喜之詐僞
曲說史猶爲證明其非安有端木之詩傳與西
河比肩竝出而自漢及隋不著經籍者乎近儒
尊之者曰傳鵠鵠則知金滕居東爲避魯而孔
書致辟管叔之說妄傳楚宮則知春秋城楚丘
爲內詞而三傳封衛之說妄夫周公之誅管蔡
也齊桓公之存三亡國也載在經史炳如日星
信斯言也六經尚書三傳皆當束之高閣燔爲

初交而左氏公穀司馬遷毛鄭以下諸大儒皆
千古眯目瞽聽寢言狂易之人乎誕誣不經莫
此爲甚而去病不以爲異何也以中庸九經分
配小雅諸什而以鶴鳴一章配修身冠小雅之
首程朱表章中庸之後委巷小生無知杜撰自
納敗闕首尾畢露其陋尤甚於豐坊之僞石經
以去病之高明淹雅老於斯文不肯一筆抹撥
顧爲稱量比擬曰詩傳毛傳孰異孰同孰得孰
失此不亦勞而無功用心於無所用乎譬之有
遺矢於此一人逐而甘之以爲觥飲也又一人

從旁正之曰是有擇焉其可嗜者五穀之精英
其他則糞穢也甘之者可謂大愚矣從而正之
者亦未可以爲智也引喻不經聊以發去病一
笑耳六經之學淵源於兩漢大備於唐宋之初
其固而失通繁而寡要誠亦有之然其訓故皆
原本先民而微言大義去聖賢之門猶未遠也
學者之治經也必以漢人爲宗主如杜預所謂
原始要終尋其枝葉究其所窮優而柔之饜而
飫之渙然水釋怡然理順然後抉擿異同疏通
疑滯漢不足求之於唐唐不足求之於宋唐宋

皆不足然後求之近代庶幾聖賢之門仞可窺
儒先之鈐鍵可得也今之學者不然汨沒於舉
業眩暈於流俗八識田中結轡晦蒙自有一種
不經不史之學問不今不古之見解執此以裁
斷經學秤量古人其視文周孔孟皆若以爲堂
下之人門外之漢上下揮斥一無顧忌於兩漢
諸儒何有及其耳目回易心志變眩疑難橫生
五色無主則一切街談巷說小兒豎儒所不道
者往往奉爲元龜取爲指南此無他學問之發
因不正窮老盡氣而不得其所指歸則終於無

成而已矣嗚呼有歐陽公之才然後可以黜繁
辭有朱子之學然後可以補大學然而君子猶
疑之以爲如是則不足以開王充之問孔誅楊
雄之僭經也若近代之儒膚淺沿習繆種流傳
嘗見世所推重經學遠若李本近則郝敬蹕駁
支蔓不足以點兔園之冊而當世師述之今與
漢唐諸儒分壇立壇則其聽焚詩傳認爲典記
也又曷怪乎孔子曰述而不作信而好古吾以
爲今人反之曰作而不述疑而好今何也以其
疑於古不疑於今知援今而證古不知援古而

證今也又曰學而不思則罔思而不學則殆吾以爲今人又反之曰學而不學則罔思而不思則殆非不學不思也學非其所學而思非其所思也僕少不通經長而失學今老矣親見去病專勤憤悱從事於經學白首紛如不知老之將至以爲今之經神儒宗非吾所逮及也又不自滿假虛心下問故因論詩傳而放言之以求正焉身雖惜於經學不知一二猶冀百世之下得吾言而存之可以歲俗學之膏肓而起其廢疾也去病其終有以教之無以爲狂瞽而舍我焉

幸甚幸甚謙益再拜

跋語

式耜編纂先生文集諸體略備而書牘猶寥
寥數章蓋先生少而高簡自命無投知自炫
之啓壯而登朝所言大抵關於國是人材不
欲以先覺居己不欲以私恩示人故槩從削
稿式耜亦編輯末繇也猶記戊辰首夏聞式
耜掖垣之信喜而寓書長安諄諄勗勉其略
曰凡人立朝先於布局有爲數十世之局者
有爲數十年之局者遞而降之有爲不終朝

之局矣欲速見小進銳退速無論營身家保妻子之徒卽果有志於功名氣節而見不出目睫志不在久遠亦所謂爲不終朝之局者也今幸遇維新之朝事不世出之主不以此時爲國家持數十世之局其何以副清時報聖主乎足下今日旣當事當以辨別人才邪正爲第一義某樸而忠某材而奸某訥而賢某辨而佞大都忠國家利社稷者必忠不忠國家不利社稷者必奸忠者必真奸者必僞真者多攘多拙僞者必佞必巧以此衡

之百不失一苟其不忠國家不利社稷則雖營三窟之巧借百足之助口舌瀾翻心力翕張必當鋤而去之剪而薙之若其他不關宗社利害不係善類消長有可以功名驅使可以名義攝持者一一當渙羣散黨引而歸之大道如此則仕路日清人才日富元氣日厚此爲國家持數十世之局者也新谷中賢者蔚起幸以此意真切商量必有同聲同氣羣起而應求者太平之期可立而待也卽此一篇先生立朝之槩不可想見乎蓋先生平生

持論一味主於和平絕無歆帆側怙之意特
忌者不知必欲以伐異黨同之見盡力排擠
使之沉埋挫抑槁項山林而後快假使先生
得來時遘會吐氣伸眉以虛公坦蕩之懷履
平康正直之道與天下掃荆棘而還太和雍
熙之績豈不立奏而無如天心未欲治平人
事轉相撓阻歲月云邁白首空山徒令其垂
老門生閉戶誦讀共抱園桃之歎此式耜於
編纂之餘而竊不勝世道之感也因并述之
以綴於後崇禎癸未八月門人瞿式耜謹跋

牧齋初學集卷第七十九

牧齋初學集卷第八十

書帳詞

復陽美相公書

兩年頻奉翰教裁候闕然屏廢日久生平恥爲
陳子康願蒙子公力得入帝城此閣下之所知
也兵垣郵中復蒙手教具知存念簪履不遺一
物感誦之餘繼以永歎一二門牆舊士頻煩傳
諭謂閣下援引不遺餘力親承天語駁阻再
三則罪廢孤臣不可枚栻之狀聖主業已洞
若觀火而閣下欲息黥補劓求播種於蕉茅間

秋駕於病顙不已難乎謙益衰年殘生日甚一日視鋒車祖道之時更復頽然篤老以迂愚頑頓之身費回天轉日之力萬一濫塵啓事必致顛踣道塗偃蹇朝命進無補于時艱退自隳其晚節不若因仍永錮長放山林庶可以上順天心下安愚分此亦操化權者萬物得所之一端也恭聞督師北伐汎埽胡塵台席戎旃曠世爲烈衰遲枯槁不能執父前驅載筆後乘凱旋之日規撫韓柳作爲詩雅用以賡元和之詩嗣皇武之雅柳宗元有言思報國恩獨惟文章此則

病夫退士之所有事而亦所以訓知已於百一也謙益謹再拜

寄長安諸公書

癸未四月

謙益衰頽晚晚放棄明時春明之夢已殘京華之書久絕此執事之所知也頃者一二門牆舊士爲元老之葭莩桃李者相率詒書連章累牘盛道其殷勤推挽鄭重汲引而天聽彌高轉圜有待闕其指意則以爲元老此出補浴之勳已成伊周之頌無忝惟是陳人長物尚滯菰蘆則格天之業尚欠分毫吠日之徒或滋擬議必欲

描頭畫角宜播其虛公拭舌膏唇補苴其罅隙
又謂謙益狂奴如故倔強猶昔從此當拆皮爲
紙刺血爲墨涕淚悲泣歸命投誠庶幾平生之
黥刑可補晚歲之桑榆可異其詞誠急而其情
誠可哀也嗟乎果若所言則元老之于我心已
盡矣力已殫矣主上以師臣待元老言無不
信諫無不從獨難此一人一事不啻如移山轉
石謙益之冥頑頽放終不可拔拭齒錄主上
固已知之深而見之確矣主上天也聖意
卽天意也天之所廢誰能興之而元老假此以

微回天之力諸人借此以市貪天之功不已難
乎羣公以聖上爲天諸人以元老爲天其爲
所天區以別矣謙益雖老鈍無似其肯附諸人
之末光移羣公之所天以事元老乎假令從諸
人之言包羞忍恥搖尾乞憐元老亦憐而與之
以一官則此一官者非朝廷之官而元老之官
也拜官公朝謝恩私室呈身識面廉恥埽地生
平鬚眉皎皎頗思孤撐另立自豎頤頰于天壤
之間迨乎崦嵫景迫棧豆戀深遂一旦覲顏俛
首希隣女之光而附乞兒之火靜夜捫心清晨

引鏡能不啞然而一笑乎分義決絕事理分明
擲糞不得不避食蠅不得不吐右軍誓墓之文
中散絕交之論業已宣布簡牘流傳長安而復
爲執事諄諄道之者誠恐執事伐木相引積薪
見憐不深惟孤臣去國之本末不精求當路柄
國之風指徒以一世虛名半生交誼交口而效
推轂之力此輩陰陽其心丹青其口虞門果闢
必將以吐哺握髮歸其德于一老湯網猶張又
且以激聒喧呶卸其咎于衆正在謙益不退不
遂咸爲絕地在羣公或默或語皆爲過端執事

而不知謙益不愛謙益也則可如其知而愛之也則必思所以處謙益且思謙益之所以自處矣爲謙益今日之計惟有一意入山永絕仕進之局進可以收拾晚節退可以保全殘生執事今日爲謙益之計則當仰體聖心俯啓時尚令得管領山林優游齒髮則謙益之自處與執事之處謙益斯兩得之矣去年鴻寶館丈入都門詒書屬之曰寄語諸君子當爲我安頓一身勿但爲我料理一官斯言也豈遽忘于羣公之耳乎天日具在要誓凜然如其言不繇衷上欺

君父下欺朋友則狗鼠不食其餘何面目見
魯衛之士乎伏望執事矜其懇惻恕其狂愚力
告冢宰諸公斷絕啓事屏除薦牘庶幾生平之
微尚得全末路之葛藤可斬此沒齒之幸多生
之感也詩不云乎我雖異事及爾同寮我卽爾
謀聽我囂囂我言雖服勿以爲笑以謙益之得
幸于執事也山林廊廟雖曰異事其誼固不敢
自後于同寮也謙益之卽謀于執事不以干進
而以求退執事者勿以爲笑使凡伯囂囂之刺
復作于今日則厚幸矣謙益再拜

答鳳督馬瑤草書

自仁兄授鉞以來無向不摧所至必克袁闖脅
息逆超授首獻賊則潛山一役游蒐假息之餘
也天方割楚盈其惡而降之罰頃者虎旅先驅
元戎後繼山峙川行風旋雷擊此正死賊天亡
之日賊遂撤浮橋斂餘衆待王師之至爲鼠伏
兔脫之計則固已氣盡魄奪矣埽江漢復荆襄
禽獻滅闖執訊獲醜在此行也固可以計日而
待矣人謂羣盜蔓延駸駸乎類勝國之季獻闖
二賊縱橫荆楚間燦發颺怒有似僞漢之友諒

而吾以爲非也元季盜之初起先自汝潁而後
徐壽輝起蘄黃布三王起鄧州孟海馬起襄陽
各有其衆各戰其地布三王最早滅孟海馬後
滅獨徐壽輝之衆久而彌熾歐普祥陷袁州妖
彭項甲陷饒徽倪文俊陷武漢明王真陷蜀皆
奉壽輝之虛號而友諒驍雄剽鷲居中布置故
天完之後繼以僞漢而江漢之區終不入元之
職方今閩曹革袁羣賊不相統屬非有友諒駕
馭之略也閩陷荆襄獻陷武漢各不相顧閩不
顧獻獻不顧閩心渙勢散易于摧敗閩陷荆襄

不能顧豫今保鄧不能顧荆襄卽其一身首尾
已不相顧而況能顧獻則獻之自顧亦從可知
也吾謂今日之計當委秦蜀之兵以掣關使不
得南而我專力于獻九江之師扼其前斬黃之
師禱其後勿急近功勿貪小勝賊之使自救擾
之使自潰此萬全之策必勝之道也兵法曰知
彼知己今不知彼爲布三王孟海馬之賊而以
爲僞漢之賊視之太重畏之太甚我先有退次
之形于胸中其氣已未鼓而竭而何以制賊之
死命乎楚豫之閒豪民大族多結寨柵以自固

斬黃真確光息之間所在不乏彼非肯爲賊用者也其被殺則怨軍也其僞降則內閒也不可不急收也二賊多用楚人以爲守令傳聞武昌守曰謝鳳洲舉人有才名者也此輩必不死心爲賊用因而用之許以殺賊自贖未有不效死者也武昌有王孫容藩字石渠者毀家弃產奔走萬里結納豪傑求爲陳思王之自效今年正月閒關還楚試一訪求之周亞夫得劇孟隱然若一敵國石渠亦豈後于劇孟乎腐儒衰晚不能荷戈執爰效帳下一卒之用憂時念亂輪困

結轡耿耿然挂一馬瑤草于胸臆中垂二十年
矣今幸而弋獲之雖欲不傾倒輸寫其可得乎
新安之事可謂大錯然金正希茹荼攻苦練兵
守土實痴腸爲國家人也黔兵之殺必誤也非
故也舍而不問則無以謝黔人執正希以爲大
慘則舉世士大夫容頭過身者胥以正希爲戒
以練兵任事爲諱亦可深慮也往年游黃山值
土寇竊發親見正希宵行露處務面胝足爲父
老子弟率先心竊慙之不敢不以告于左右語
云惺惺惜惺惺知仁兄必惻然隱痛不以爲狂

瞽而吐弃之也秋風蕭條行閒勞苦惟爲社稷
努力強飯自愛

上應撫鄭公書

謙益以辛巳春爲白岳之游于時土賊竊發金
正希館丈督率鄉里丁壯腰刀帕首身編行伍
捍禦桑梓已而賊退解嚴親見正希食粗糲衣
大布朝壺暮鹽如苦行頭陀奮臂橫身讓夷急
難心竊壯之重之以爲士大夫盡如正希朝廷
尚有人天下事尚可爲也不意有黔師之役牽
連誣誤橫罹法網又竊壯之惜之所門之事甚

易明也。襄漢陷沒，兵民奔潰，而黔兵突入徽境，風雨奔驟，聲勢洶涌，安知其爲兵乎？寇乎？抑亦寇而冒兵兵而冒寇乎？當此時，有能統衆捍禦，使片馬不入，四竟按堵，將以爲功乎？罪乎？有捍禦不能，無格鬪有格鬪不能，無殺傷有殺傷不能，無鹵獲主兵者，亦安得而禁之乎？魏勃有言：失火之家，豈暇先言大人後救火乎？此切喻也。鳳督有事征勦，方思投醪挾纊，以鼓三軍之氣，黔師之殲也，安得不拊膺痛哭，呼憤告哀，庶幾慰死者而勵生者恐。廟堂未知本末，重有處

分徽人以禦寇獲罪正希以任事受惡海內搖
手相戒以聚鄉兵保鄉里爲禍首而首鼠兩端
之徒開門揖盜者反有以籍口良可慮也竊謂
明公宜據實抗疏爲主上別白言之善爲調
齊用以平鳳督之氣服黔人之心解徽人之禍
中朝必听然叶應而鳳督亦降心以相從則此
事了矣詩不云乎王于興師修爾于矛豈曰無
衣與子同仇今之所仇者東奴也闖與獻也鳳
督之募黔也徽人之殺黔也同爲臣子同事師
旅皆有同仇之誼焉敢爲賦無衣之詩以告于

下執事伏惟采擇可勝瞻望

回金正希館文書

比年流氛披猖所至陷沒雖守土者之不職亦
繇士大夫里居者繩營苟苟彼此顧望以致一
敗塗地載胥及溺而莫可如何也春夏之交風
鶴震驚流聞黟祁閒殺賊差強人意臥病委頓
爲躍然投袂而起不意乃有殺黔索償之事牽
連註誤議論鋒涌良可爲三嘆也嘗觀元末盜
起汝潁而襄漢斬黃應之斬黃之賊旣陷江州
旋略南康鄱陽卽由婺源犯休寧一夕而陷徽

州由是而陷昱嶺關破杭州蔓延吳興延陵江南之塗炭從此始當時克復徽杭殺妖彭項奴兒諸盜魁遏楚賊方張之勢雖董搏霄三旦八輩督師勦禦而汪同程國勝俞茂結集民兵誓死血戰恢復城柵其功尚多不肖見吳中士大夫如處堂燕雀每談及捍禦鄉井輒努目詛詈以爲妖言怪物而楚之賀對揚以閭臣居會府一籌莫展投身江流雖曰死忠與魚鱉何異衰殘病廢仰屋嘆詫每思新安土風高堅士氣猛獷忠義感激遺風尚在每欲舉黔祁之役以激

勸當世之首尾縮惡甘以都邑身家拱手而奉賊者今舉事一叅錯而吏議隨之吳中之鄙夫懦人爭搖首閉目以新安爲戒天下有事誰復敢奮臂爲國家出死力者此不惟新安之憂實重爲國家慮之也鳳督慷慨誓師滅獻闖而後朝食此事不憤盈執奏何以謝黔人何以鼓舞三軍壯式蛙避螳之氣使其設身易地深知徽人之捍禦如此祁戰之本末如此同爲臣子同爲國家寧有不相憐相恤降心以相從者乎仁兄純忠大誼鬼神所知 聖天子拊髀頗牧朝

銀鐙而暮節鉞往往有之此行也必且大用
必有爲也吾敢爲天下執左券矣區區所祝者
更望仁兄平心易氣以天下事處天下事念督
撫擔荷之苦思師旅召募之艱深惟憤盈執奏
者之出于不獲已以同舟遇風胡越相救爲心
則一切葛藤口語俱可一刀斬斷此封疆之幸
國家之福也非調人賤媒之私語也伏承來命
信筆奉復寒暄慰唁之詞皆未敢闌及萬惟炤
鑒不宣

永豐詹京兆七十壽帳詞

伏以五百年有名世見堂構之相仍七十歲爲
古稀祝期頤之未艾瑞徵南極慶在本朝恭惟
某官閣下道叶先知炤隣幾庶凜若大河之一
斷裁剗不留巍然象鼎之萬均表儀斯重堅持
素節不事浮華慮囚以平反爲能如于定國之
在廷尉出守以清淨爲治繼汲長孺之牧淮陽
褰帷致蠻蛋之賁琛澤流嶺海削牘杜貂璫之
廟貌霜肅秦川乃陟月卿晉除日尹玉衡冰壺
之譽方藹清時岫峴雲關之思彌深晚節臧孫
有後范氏世家羔羊本潔白之風驄馬繼澄清

之志惟茲小歲正值大年對冰水之如澗香浮醺
醺倚玉山而列俎光映僊俄席長筵以祝延舉
壽觴而相屬金章紫綬炤耀清尊綠鬢方瞳輝
煌黃髮江梅破白比韓圃之晚香岸柳催青啓
陸家之夕秀家傳忠孝是先師無盡之燈心養
和平卽仙家不老之藥益也紀羣輩行孔李通
家八千歲爲春八千歲爲秋恭紀冥靈之曆周
公拜乎前魯公拜乎後式瞻橋梓之榮投我以
桃何以報之青玉案旣醉以酒我姑酌彼黃金
罍調瑞龍吟徵普天樂

長筵繞爭看待臘春回試花梅早千年函啓樵
陽龍沙期會依然又到○華顛老贏得西清鍾
寂東華塵杳天家乞得閒身霜筠雪竹相將壽
考○膝下兒童鵲起留臺簪筆雞栖焚草攜取
後湖春波遙送清醪綠章白簡頻寄朝天表停
杯問蓬萊烽偃台階星坼笑指冰山倒合樽列
坐觥籌了滄海塵多少寰區內渾如樽疊平好
光華日月堯天清曉

牧齋初學集卷第八十一

疏

五臺山募造尊奉

欽賜藏經寶塔疏

五臺山晉濟法雲等寺各有尊奉藏經 皇明

弘治萬曆兩朝先後欽賜者也洪惟我 孝宗

敬皇帝奕世肆德天下歸仁迨及我 神宗顯

皇帝久道化成軌迹夷易是以琳宮寶塔移梵

率於人閒玉軸琅函徧山川爲海藏觀五臺之

頒賜若此則四海之尊崇可知蓋我佛塵刹現

身實爲 二聖故斯世撈籠被化遠及百年惟
豐亨豫大之靡嘗致奴虜寇盜之交作兵燹纏
綿於赤縣干戈旁午於靈山崇禎六年九月流
寇入焉七年七月逆奴入焉奴則旋去而復來
寇則久踞而後遁赤麋辮髮更番選佛之場螳
賊羯胡蹂踐清涼之國挖金剔玉腥穢佛身碎
錦剝綾毀傷法寶飛灰蕩燼慘悽經雷火之輪
兩血風毛恍惚洒入天之泣比丘妙象感是因
緣誓欲度此殘經鎮以寶塔將諮謀於介衆乞
唱導以一言余惟萬曆全盛之時正三寶昌明

之運北胡削衽受戎索於法王西虜扣關回狼
心於佛乘肆我皇風之宣暢彌增佛日之光明
劫運漸開風流滋下鬪諍之禍國種彼刀兵貪
黷之殃民慘於殺掠島夷冒帝釋之名號魔民
倒龍象之刹竿凡茲孽靈之萌芽皆是氛祲之
徵兆欲躋昭夏應仰慈恩山僧之誓願聿堅我
佛之鑒觀斯在所建之塔非塔卽諸佛之全身
所藏之經非經乃諸佛之慧命一旦浮圖建豎
崔離涌見於虛空從此多寶輝煌龍藏何殊於
半滿顯惟列聖御寶刹以周天佑我聖皇

乘金輪而柱地威神炬燭則犬羊戎馬投戈聆
替戾之音聲慈炤燈明則南戶左言率土現宰
波之影像彌天寶網修羅永遁於藕絲匝地金
繩震旦盡登於蓮界卜年卜世比國祚於塵沙
聖子神孫鞏皇圖於法界如上功德資廣長
以證明若欲稱揚書海墨而難罄崇禎十年九
月嘗熟錢謙益謹疏

西方蓮社小引

愈先上人梵行精嚴住持畿南之永聖寺海內
學士大夫過斯地者靡不停驂解鞍參禮扣擊

信宿而後去丁丑初夏余被急徵抵新城去上人所居不一舍有感於杜子美宿大雲寺贊公房之事申旦不寐枕上成四詩及抵寺而上人已赴碧雲講席洞門深院梵放鍾殘詠子美沃野塵沙之句與其徒佇立久之徘徊悵快而去所作四詩不復繕寫亦不復省記爲何語矣戊寅秋余解獄南歸上人順世已逾年枉道出高陽不復過高橋拜上人影堂殊以爲恨今年其上首弟子龍埜訪余山中奉上人遺命將糾合宰官居士結西方蓮社於寺中請余一言以爲

唱導嗟夫斯寺也當神京之要路居扶風之上
游馬足塵飛車輪霧合當其戒徒御騁輜軒綸
閣闕員延英促對往往望招提而掉臂聽梵唄
而攢眉一旦權失寵衰時移物換漢相憂養牛
之賜秦市思逐兔之游政事堂中覽州圖而悻
悻夕陽亭畔仰藥盃以流連當斯時也顧欲羨
山寺之高眠聽禪堂之粥鼓其可得乎若乃刀
兵劫起刑獄政煩白骨青燐猶入深閨之夢單
衣葦席半爲通籍之人嗟玉石之俱焚感蕙芝
之互歎丁茲殺運哀我生民不空門之歸也不

樂邦之往也將安往乎將安歸乎愈先運無緣
之慈流宿因於沒世龍堊發廣大之願傳遺鉢
於師門唱此勝緣共延法侶將使天涯道路轉
盼西方宦海風波回頭彼岸春明門外無非覺
路津梁王舍城中盡是華嚴樓閣不獨同登寶
筏受佛勅於再來抑可長護金輪報國恩於無
盡余也菰蘆長物草土餘生以是因緣遙爲贊
歎欲饑銀鐺之業債聊舒筆墨之光明嘗寂光
中知上善必爲印可塵沙劫裏仗諸佛共賜證
明云爾

化城寺重建大殿疏

雙溪化城寺者徑山興福萬壽禪寺之下院也
接待之工經始於佛日化城之號肇錫於寧宗
歲月滋深壞成相續牛眠馬鬣兆域族於寶坊
鳥革翬飛尋斧縱乎行樹斷碑欲泐遺礎僅存
嗟像教之式微蓋人天之有待今兵部右侍郎
總督薊遼本如吳公最初承紫栢之付囑身任
金湯旣而作牧伯於斯邦大弘誓願爰有尊宿
號曰鎧公實惟仔肩罔惜膚髮于是機緣輻輳
攝折雙施革面革心非焦瑕之設版我疆我理

若汝陽之歸田形勝頓還灌莽斯闢琅函貝葉
咸有度棲軍持漉囊于焉至止禪誦不改像設
有嚴名曰化城實則寶所矣鎧公草昧伊始規
畫方新逝將大建法幢重構寶殿忽焉順寂時
不待人其法嗣曰慈門德公念本師之云亡慨
墜言之猶在矢志紹述努力經營吳公乃自薊
門詒書某曰吾子德公之族姓而鎧公之雅游
也無靳一言以告四衆余惟吳公身連重鎮道
栖空門鈴柝相聞而鐘魚互答夕烽傳報而禪
燈湛然故能視空有爲一如融理事而無碍且

公護塔廟如頭目則何忍三韓之故土陷彼犬
羊憫衆生如裏毛則何忍遼海之遺黎沒於湯
火運慈悲爲神武借撻伐爲撈籠則白山可夷
黑水可塞腥羶可以爲淨土椎髻可以爲佛奴
以是機緣熾然建立豎浮圖於雲際固將譬彼
聚沙移甕率於人間又復何殊折草哉斯言也
塵沙諸佛大千劫內自應彈指證明紫栢諸公
嘗寂光中亦有合掌讚歎云爾

一樹菴募造佛殿疏

崇禎庚午孟冬余與孟陽共栖拂水山居太空

上人過而訪焉於時霜楓未落秋潦始清停車
則千林放紅晏坐則萬頃韻碧上人顧而樂之
留連旬月然且別去乃踵門而請曰性融所居
一樹菴在新安黃羅山中偕同衲性智經營滋
久庵廬一新住持有嚴禪誦不絕惟此如來之
像設尚無殿閣以莊嚴敢祈一言以告四衆余
惟能仁之慈願歷河沙而不窮象教之冥搜書
海墨而未了况茲庵締構之終始與上人履歷
之因緣孟陽所敘次緣起備矣余復何言哉余
嘗謂壞空成住上觀千歲則塵沙之器界歷然

報應果因近考目前則昆明之劫灰如在惟茲
徽郡昔號繁雄旋觀寅卯之間幾成百六之會
虎入邑而傳翼豕擇人以磨牙絳帕黃旗布地
有模金之尉朱提赤仄傾家無避債之臺僇辱
橫及於妻孥屠殺不免於雞狗亂將作矣閔孰
甚焉一旦天晶日明波恬浪息仰父俯子無虞
瓜蔓之抄戶誦家絃盡脫葦笥之籍黃白之山
林無恙金銀之氣色如新凡此皇恩誰非佛
力當知昔年之水火竝衆生之業識所招則今
日之清寧正我佛之光明所被誠欲迎和而避

殺無如植福以種因况此邦之人夙饒物力結
構則丹楹刻桷上薄雲霄宴會則脰鼈膾鳧下
窮水陸捐華屋一椽之直省玉筵一金之需用
以回向佛門庀治精舍聚沙可以建塔累土可
以爲山兩上人無著天親業已現身而應化諸
善信慈悲法喜何難彈指而落成哉上人曰善
哉融等將奉此木鐸開彼金繩子他日腰包扣
訪樂觀厥成可也

徑山募造大悲閣疏

雙徑山中有一比丘名曰大舟發大願心願於

此山起大樓閣作大悲菩薩像建大悲懺壇誓願利益有情紹隆三寶俾此山中祖師代興重規疊矩熾然建立如唐宋時走五百里踵居士門願得一言以爲昌導居士合掌讚歎而語之曰大悲觀世音以八萬四千母陀羅臂八萬四千清淨寶目遍入微塵國土拯拔一切有情離諸苦惱種種善巧方便現身說法必以時節因緣爲主如華嚴普門品所陳是也佛言一切國土種種災難起時當造千眼大悲像誦持大悲心陀羅尼神呪能使敵國歸降雨暘時若百官

萬民皆行忠赤諸龍鬼神靡不擁護今 聖天子在宥天下具正等覺乘轉輪位謂非大悲菩薩現身不可也然而東虜游魂尚在海內奸宄閒作 宵衣旰食四顧而未舍然是豈山川鬼神有不率俾而百官萬民有未盡忠赤者與成祖文皇帝御製大悲經呪序曰如來化導首重忠孝忠臣孝子跬步之間卽見如來如其不然轉盼之間卽成地獄末法衆生造孽深重不忠不孝上千天地之和下結山川之沴故水旱刀兵之劫起而應之當此時節因緣化導忠孝

消疵癘以還太和牢籠拔濟人王法王之願力
均有賴焉 文皇帝之心其卽 今皇帝之心
亦卽大悲菩薩之心也歟山僧野衲麻鞋草食
無蒿目當世之志以何因緣弘發誓願豈非塵
沙諸佛所護念而 文皇帝之靈實式憑之者
歟大舟勉之吾知吳會之間金錢布地飛樓傑
閣如甍率天宮下移人世在一彈指閒而已

天台山天封寺修造募緣疏

佛法之有宗教律也譬之一鼎三足不可闕一
者也然而權實隱顯開遮歷然各視其時節因

緣以爲唱導譬之醫王因病發藥寒熱溫涼君臣佐使用得其當卽烏頭狼毒皆可以療病苟爲不然則用參苓以殺人與毒藥何異哉萬曆年中諸方有三大和尚各樹法幢紫栢以宗雲棲以律憨山以敎三家門庭稍別而指歸未嘗不一譬之近世名醫其亦猶東垣河閒丹溪之診治不執一方而能隨方療病者歟三老旣沒魔外煩興上堂下座戲比俳優瞎棒盲拳病同狂易聾瞽相尋愈趨愈下師巫邪說施符呪棗亦皆借口參禪誑惑愚昧邪師惡道下地獄如

箭射良可悲也良可懼也長夜將旦台教聿興
鬼神爲之唱緣人天爲之呵護喚迷頭者必資
明鏡刮眯目者必仰金篦攻台教以治狂禪庶
幾廢疾可興膏肓可砭立方療病其莫先於此
乎天台寺萬曆某年不戒於火比丘某發大誓
願勵志修復而乞余言以告四衆嗟乎寺之火
也火於正教將燼之時比其修也修於狂禪漸
息之日天火之以示戒而人修之以顯法除舊
布新扶衰革弊其亦有因緣時節示現於其間
乎我知斯寺熾然建立智者大師現身佛刹如

寶羅網豈待余言爲讚歎哉

華山寺募緣疏

吳郡華山寺者晉支公遁擁錫地也靈峯鬱起
青牛垂度世之文古澗奔流白馬著飛山之跡
蓮花一瓣六時之刻漏交傳鳥道千尋七寶之
樹聲競奏雲棟風窻信物外靈真之宅殘燈仄
壁豈人閒香火之宮自榛蕪載闕於千年而謠
詠僅存其一畝禪誦不改衣衾之巢鷄暫驚雲
樹依然洗鉢之孤猿乍返居士旣惟力以護持
名僧乃應機而至止演四十九年之法笑比拈

花剗一百八句之宗頭能點石印以息心似化
人之語幻叅必了義猶谷響之答泉可謂釋網
重維靈山生色者已然而班荆布席茂草尚深
於法堂捉麈譚經天花僅散於丈室將薙草崇
基依巖表刹功德譬之河沙唱導先乎隻字余
惟今代像教凌夷波旬放恣濟空山而設版逐
法王爲逋客攘臂仍之恬不爲怪矣今夫高岸
爲谷屈指已移劫火洞然大千俱壞何況功名
舟壑薤上之露易晞第宅滄桑局內之棋不定
一旦金穴旣圯銀海不飛碧血化爲鬼燐黃腸

穿爲兔穴而空門之鐘磬映玉匣以傳聲古殿
之燈火拂金蚕而流炤覓游知媿灰冷何堪人
皆爲佛法而拊心余則愍斯人而雪涕且土固
有宜物各有主即使佞佛匪福謗法無郵而經
像煙銷改精舍爲甲乙之第梵唄響絕鞠花宮
爲禾黍之場蘭宇擘悲松巖獻誚是可忍也誰
能說之嗟乎佛法無諍象法有爲凡具信心各
發弘誓使殿閣相望丹青竝勒金姿寶相三身
璀璨於中天白足赤髭四花炤曜於萬品則揭
慧日於昏衢在我不徒自利而扇涼風於火宅

使彼亦復無他苟能讚歎於斯言即可迴向乎
諸佛

重修虎丘雲巖寺募緣疏

虎丘雲巖寺之燬於火也蓋八年於此矣丙子
二月相國茂苑公投簪海岸邀野老以來游載
酒松關偕同人而至止於時風物駘蕩花柳芳
妍相與縱覽雲山俛仰今昔香樓金道無復舊
觀架壑梯巖僅存遺址天荒地老悲昆明之劫
灰鬼爛神焦悵陸渾之新火琅函寶笈仰惟
英廟之奎章尚爾騰輝於草木金鳧白虎緬想

中吳之地脉能無寄旺於林臯靈山遭灰墨之
刑同罹一切福地具莊嚴之相終免三輪山僧
既袒右而告哀羣公咸虛左而授簡資其固陋
俾爲乘韋之先相此機緣用作布金之導余觀
吳下長安之甲第錯列堦衢雒陽之名園彌望
阡陌然而土木日廣工作滋興役鬼神而不休
靡金錢而無算其於茲山則未聞有咄嗟檀施
歡喜經營者亦獨何歟夫燥濕暑寒宜有闔廬
之辟歌哭聚族豈無輪奐之稱若乃廣廈曲旃
制逾北第右平左城僭擬西都故知傳舍之閭

人亦懼高明而瞰室一旦金還車子夢醒役夫
朱戶丹青俄爲外廐黃衫步輦忽降中堂玉盞
金杯取次資爲口實斲椽礮石寧渠寫入券書
嗟何及矣不亦愚乎有白傅之文章斯可以居
履道之亭館有晉公之勲業斯可以治集賢之
池臺怪石奇峯遠樓磐固之苗裔丹楹綺戶近
撫威遠之家園方謂奧突風樓并攢一室更詫
十洲三島幻出人閒何待高傾而曲平早已壑
譏而峯誚袁廣漢之花木移置上林何將軍之
山林鞠爲茂草固其所也又何歎乎若能省彼

錢刀惜其物力追昔賢捨宅之意欣今日興復之工以名山爲園林園林莫佳焉以古寺爲第宅第宅莫甲焉以青山白社爲主人則主人嘗在不須悲更易於王侯以高人勝流爲徒侶則徒侶不孤無事戒傷殘於草木東西二寺之名勝固將煥發千年珣珉二王之風流何難接踵後世哉若夫紹興之經藏修佛事於戎馬倥傯之時則張魏公逗機而說法永樂之興修表佛刹於神聖雍熙之日則楊文貞順化而鋪文凡我龍象之倫竝了金湯之義願力堅固一切如

來所證明因果弘多無煩窮子爲唱導者也崇
禎九年三月虞山老民錢謙益疏

募修闕元寺萬佛閣疏文

我太祖乘金輪以御世嘗稱佛氏之教幽贊
皇綱列聖繼承崇奉不替三百年來華夏又
安戎狄賓服華嚴世界涌現於閭浮提何其盛
也神廟之末泰西狡夷竄入中夏蟻聚螺傳
久而益滋士庶惑其教者敢於背違祖訓毀
棄佛像甘爲左食侮言之徒未幾而羯奴叛蓮
妖興生民塗炭王師在野刀兵之禍迄今未艾

幸有興嗟於被髮邵氏致感於聞鵲西教之來
識微之君子不能不爲之三歎也今年奴越畿
輔躡山東血肉狼籍骸骨撐柱蓋燕趙齊魯之
閒旁趨倒植背佛乘而崇西教者多矣宜其及
也開元寺僧海能慨寺後萬佛閣久圯以修復
爲已任吳君子張異度徐九一皆感其精誠爲
之唱導而屬余以一言先之余惟今天下奴寇
交訐淮海震動而吳中獨不受兵此聖天子
之福力也亦佛力也然西教之浸淫闌入亦有
年矣蠶生而孽牙不可以不備開元建自赤烏

石佛因緣宣布於震旦於斯地也作危樓傑閣
供養諸佛爲人天之眼目士庶瞻禮見像起信
其必能仗金剛力墮彌戾車我知西教不崇朝
而滅熄矣予以仰祝萬壽寧風旱彌刀兵俾
吳中永爲樂邦佛國而海內重覩金輪之盛豈
不休歟昔僞吳張氏改易開元臥佛爲立佛吳
中脊脊不寧國初重建臥佛有時和年豐之瑞
開元居郡治之坤方其興圯修廢於郡國形勝
不可謂無關也余願吳之君子慨然布金俾不
日成之可矣

北禪寺興造募緣疏

吾郡之北禪寺卽唐之乾元寺皮陸集中所云
戴宅蓋戴逵與其子顥捨宅爲之宋祥符中賜
名大慈講寺其詳見於顧逋翁趙子昂記中本
朝興圯不一隆慶萬曆之間三空恩公量虛惠
公野懷果公相繼住持三公之後有熙遠胤公
深修五定淨持七支盡力宏護以起廢接衆爲
事而屬余爲唱導之文余惟今世法幢倒折魔
外盛行波旬之屬儼作導師師子之蟲推爲龍
象聾聚聾而擊鼓瞽扶瞽以拍肩黎丘之奇鬼

殺人子而不疑西土之迷夫失已頭而狂走佛法之凌夷可謂至於斯極者矣惟茲古寺肇自乾元是法珣法藏二公之所以闢台教也是淨梵法主之所以演法華也是東昇澄炤諸老之所以弘講席也居今之世而欲樹末法之津梁救衆生之狂易非反經明教遵古德之遺規其道無繇也夫佛法如大地之載衆生從地倒者須從地起經教爲藥草之療百病中藥毒者還用藥攻知假子之非真則真子故在黎丘之鬼禍自銷識迷頭之非我則明鏡了然若多之狂

性立止窮冬凜冽咸借庇於復陶儉歲饑均
待命於良稷胤等發願興復意在斯乎意在斯
乎凡我善信共葺勝緣風樓月殿溯寂公禪坐
之時金磬貝書似皮陸談經之日重耀昏衢之
燭盡隳彌戾之車不惟珣梵諸老衣鉢嘗新抑
亦靈山一會儼然未散矣

募建表勝寶恩聚奎寶塔疏

茲塔之建也故觀察觀復蕭公大發誓願力任
仔肩自哲人有摧木之嗟而寶地乏布金之助
經始垂及廿載量工僅逾四成厥維艱哉嗚呼

唏矣原夫觀察之造塔願力固歸元於佛事緣起實發因於彤家語佛法殆書海墨而不窮論彤家乃留更僕而可數蓋邑之有來脉也自沙山而顧山而虞山而縣治結焉邑之有朝水也自曹湖而宛山而華蕩而州蕩而環流聚焉兌龍結則巽維之體勢宜高客水朝則城口之關闌欲緊乃今平沙鋪展分支徑落馬鞍流派奔騰順勢直趨婁水縣治已結無層拱疊衛之形水口長流寡磅礴縈紆之勢山自西來者旣抱我而復去水之東下者欲顧我而不留是以罔

有所鍾我不能審其所會而夫有所止彼反得
乘其所來屹彼浮圖奠茲巽位內可以朝揖縣
治外可以攔截衆流移主客反背之情成龍虎
回抱之局在昔東西瀟澗卜雒所以契龜陰陽
流泉居岐於焉相宅又况托因緣於像教表福
德於法輪者哉乃者畚築弛工登馮輟響樹網
侵凌於鳥鼠雕角穿穴於雨風未能符儀鳳之
祥抑且犯青鳥之忌何也巽爲文章之府塔有
卓筆之形人言卓筆無鋒當主文星缺陷且入
城而瞻塔猶坐堂而視檻朽木枝撐舉目則覩

戈矛之狀積拱斷爛觀象則應破碎之占是謂
勢吉而形凶法當趨全而補缺年來白茆淤塞
七浦奔趨昔猶或却而或前今則有瀉而無折
譬如千帆競驚萬馬橫馳違蜿蜒翔舞之經紀
簾切箭割之讖水局既汗漫莫鎖龍身將阡洩
無餘陵谷之變如斯桑梓之憂曷已矧斯邑夙
稱富庶久際昇平黑白之業橫陳人物之蓄多
有而訛言屏息於邑屋奸軌斂跡於郊圻凡我
邦國之教寧孰非佛力之加被惟茲塔廟號曰
支提用以表勝而報恩亦能滅惡而生善祥雲

蓋覆故知劫火不焚淨土莊嚴定使三災永息
役鬼神而周沙界有若微塵寧風旱而彌裁兵
何殊影響此又人天交贊事理同符者矣謙益
往觀勝因會叅末議久慙病廢莫效涓埃爰有
老人粵惟戴氏甲子齒逾於絳縣晨昏行比於
緇衣載感辟容屢占異夢趣斯塔亟宜建豎不
啻三令而五申囑謙益力爲導揚幾於辟咎而
提耳嗟乎方今綏冕鶴列俊乂鵬飛卿大夫翹
首而分王國之憂都人士拭目而觀用賓之利
惟此比閭之有事宜屬版籍之老民古稱謀及

庶人亦曰詢於介衆管仲求識道於老馬田單
拜小卒爲神君斯佛勅所以下及葛藟在凡夫
何敢仰辭筆舌伏望巨公大人善男信女觀形
覽勝知鄙言之不爲無稽揆果察因信佛說之
歷然有據共矢宏願大施淨財俾雀離之浮圖
一新烏目之地形增勝三輪涌地何須玄度重
來七寶現前卽是育王出世從上諸佛當共證
聚沙之緣庶我愚公亦允叶移山之願天啓七
年歲在丁卯八月朔日聚沙居士錢謙益疏

書西溪濟舟長老冊子

庚辰之冬余方咏唐風蟋蟀之章修文譙之樂
絲肉交奮履舄錯雜嘉禾門人以其禪師開堂
語錄緘寄且爲乞敘余不復省視趣命僮子於
蠟炬燒却颺其灰於溷廁勿令污吾詩酒場也
獻歲拏舟游武林泊蔣邨策杖看梅徧歷西溪
法花憇鄭家庵濟舟長老具湯餅相勞觀其舉
止樸拙語言篤摯宛然雲棲老人家風也口占
一詩贈之有頻炷香燈頻掃地不拈佛法不談
詩之句不獨傾倒於師實爲眼底禪和子痛下
一鉗錘耳師以此地爲雲棲下院經營數載未

潰於成乞余一言爲唱導余惟今世狂禪盛行
宗教交喪一庵院便有一尊祖師一祖師便刻
一部語錄吟詩作偈拈斤播兩盲聾啞啞互相
讚歎架大屋養閒漢展轉牽勸慧命斷絕同陷
於泥犁獄中披毛載角宿業未艾良可憫也良
可哀也師能守雲棲家法持戒護生專勤淨業
肯堂肯構爲雲棲荷擔兒孫當魔外猖披之日
隱然爲正法長城天龍鬼神所共護念區區下
院一茅蓋頭於建立乎何有或謂雲棲立法平
穩門頭稍弱其後人未必有豎起脊梁負荷大

事因緣者余以爲不然譬如人家祖父創業重規疊矩子孫懦下不失爲鄉里善人不至爲惡劣敗類滅門絕戶也爲雲棲之弱子猶愈於爲魔外之狂兒也君子創業垂統爲可繼也書之以爲下院募緣序并以諗於世之爲末法金湯者辛巳仲春聚沙居士書於蔣邨之舟次

追薦亡友綏安謝耳伯疏

同志曰友誼本結于三生今也則亡悲益深于一旦輒陳微悃仰瀆慈尊亡友太學生綏安謝光申少能振奇壯而學道疲精竹素誠執林之

勞人矢志金湯信法門之爭子乃以命運之蹇
兼之疾疫之凶一領青衫不分生埋于塲屋半
生白骨終然死客于道涂嗟戢身之一棺何殊
牖下數藏舟于半夜已隔生前塵尾劇談尋味
齒牙之論蠅頭細字摩娑篋笥之書陳迹依然
新吾安在伏念兆申負氣壯往種性多聞惟其
以俠而兼儒未免借嗔而作佛捨身布髮固肯
爲法而忘軀努目信眉亦多輕死而重氣心依
蓮漏久已種淨土之因緣身入藕絲或恐作修
羅之眷屬在凡夫何從何去惟如來悉見悉知

敢以未了之交情仰証無遮之法會恭惟大覺
早賜證明放嘗寂光攝旅覓于孤圓之白月入
無生忍銷客氣於方熾之紅爐誓願剎塵窮劫
報恩于無量圓融淨穢它生受勅以重來

爲卓去病募飯疏

農山先生學本真儒仕爲廉吏有包函宇宙之
大志而蓋頭僅存其一茅有饑寒溝壑之深心
而量腹不充其數口三旬自笑一飽無時原憲
之固窮貧也非病潘岳之用拙信而有徵寄矣
富人誰與指道旁之困傷哉貧士終然泣泉下

之珠敢告同人共思周急或授餐致弟子之養
豈必萬鍾或扣門途賣文之錢何妨滿陌無令
方朔長羨飽于侏儒如彼淵明亦銜恩于冥報
向仁祖而索食故自農山之素心效微生之乞
醯抑亦我輩之能事謹疏